

Date - 29/07/2025 Time - 7:30 -7:40Hrs

AKASHVANI AIZAWL

REGIONAL NEWS BULLETIN

HEADLINES (MORNING)

- 1. Mizoram State BJP President, Dr K. Beichhua an Union Finance Minister Nirmala Sitharaman i hnenah Mizoram harsatna leh mamawh hrang hrangte a thlen.**
- 2. MNF Senior Vice President, Dr.R.Lalthanglianan kumin hi sorkarin sum a puk tam ber kum a ní a ti.**
- 3. Vawiin Lok Sabha inkhawmah Operation Sindoor chungchang sawiho chhonzawm a ni dawn.**
- 4. Ni nga chung ramri buai avanga an inkah hnuah Thailand leh Cambodia te chuan inkahhai puan an remti**

<><><>

MIZORAM BJP PREZ MET FM

Mizoram State BJP President, Dr K. Beichhua an nimin khan Union Finance Minister Nirmala Sitharaman a hmu a, Mizoram harsatna leh mamawh hrang hrangte a thlen.

Union Finance Minister nen an inkawmnaah Dr K. Beichhua chuan tun dinhmuna Mizoram chhan hrang hrang avanga harsatna a tawh mekte leh sum lama harsatna a neihte chu lo zirchiansak tur leh, tanpuina awm theite a kawng lo dap pui turin a ngen a ni.

Union Finance Minister chuan an thil thlente chu lo enzuisak a tum thu sawiin, remchang hmasa berah Mizoram rawn tlawh a tum thu Dr. K Beichhua hnenah hian a lo sawi a ni.

<><><>

SEOC REPORT

Mizoram chhunga district hrang hrang thuneituten State Emergency Operation Center an hriattir danin, kumin chungin ruahsur nasa avanga inchhia leh in chim 283 a awm a, in rauhsan 345-a awm bawk.

Mizorama ruahsur nasa avanga in chhia leh in chim hi Serchhip district-ah tam berin 102 a awm a, Serchhip district-ah hian in rauhsan 125 a awm bawk. Aizawl district ah pawh in chhia leh in chim hi 20 awmin in rauhsan zat pawh 119 a tling a ni. Champhai district ah in chhia leh in chim 41 a awm a, Lunglei district-ah 26, Siaha district-ah 30, Kolasib district-ah 24, Lawngtlai

district-ah 7, Mamit district-ah 6, Saitual district-ah 9, Khawzawl district-ah 10 a awm bakah Hnahthial district-ah 8 a awm bawk.

State Emergency Operation Center-in a tarlan danin district hrang hranga in rausan zat hi Lunglei district-ah 37, Siaha district-ah 26, Champhai District-ah 5, Kolasib district-ah 6, Mamit district-ah 1, Saitual district-ah 3, Khawzawl district-ah 14 leh Hnahthial district-ah 9f a awm a ni. Kumin ruahsur nasa avang hian Mizoram chhungah lei tlahniam hmun 12-ah a awm a, mi parukin nunna an chan tawh bawk.

<><><>

SAMPOORNATA ABHIYAN

NITI Aayog hnuai Aspirational Block te hmasawna tura inelna ‘Sampoornata Abhiyan’-a Ngopa block atanga hnathawk thate lawmpuina hun ‘Sampoornata Abhiyan Samman Samaroh’ chu Saitual Auditorium-ah nimin khan neih a ni a. He hunah hian Commerce & Industries changtu Minister Pu F. Rodinglian a hmanpui a,

Minister chuan Sampoornata Abhiyan ah Ngopa RD Block a tih that ber bakah Mizorama NITI Aayog tehfung paruk te tihlawhtling vek thei Aspirational Block awm chhun a ni a ti. Ngopa block chu block hnufual, chawikan ngai aspirational block a ni reng tur a ni lo, a ti a, he dinhmun atanga tal chhuak tur chuan kil tinah tanho a ngai a, khaw tinah hmun dang aia thlai tha duh bik leh tui bik te chu ching uar a, hlawk zawka hralh sum a chantir turin hma an la mek, tih a sawi a, Tuisa link road te pawh siam mek niin, tun dinhmunah Mimbung, Teikhang leh Hrianghmun atanga pan theihin link road zau tak an lai zo tawh tih a sawi a, tihchangtlun zel an tum thu a sawi bawk.

Nimin vek khan ni thum chhung awh tur tualchhung kutkawih phochhuahna exhibition ‘Aakanksha Haat hawn nghal a ni a, Self Help group te leh tualchhung mi ten an thil siam te chu mipui lei theih turin an pho chhuak a ni. Hei bakah hian DC Office atang Aadhaar update, Income, Residential, Tribal Certificate, etc te a thlawnin a siamtir theih a, Health department atang BP leh Blood sugar te a thlawnin a check tir theih bawk a ni.

Mamit Bialtu MLA Pu H. Lalzirliana pawhin Mamit Siamliana Hall-ah Sampoornata Abhiyan Award semin kar khat chhung awh tur Aakanksha Haat, tualchhung siam thil hrang hrang phochhuahna a hawng nghal bawk.

Mamit Bialtu MLA chuan Mamit district pawh Aspirational district ni mahse zirna lamah te, hriselna leh in enkawlina lamah te leh kawng hrang hrangah hma a sawn zel a ti a, ram changkang apiangin zirlai naupang te chawikan a tum thin a, Mamit district pawhin hma lam a pan zel a, hemi kawng a hnathawk tha te chawimawi hi an phu a ni a ti.

Sampoornata Abhiyan hi ramchhunga Aspirational district leh Aspirational block-ah te hman a ni a, he prog hnuai an hmalaknaah Mamit district leh Reiek Block chuan Bronze lain hmun 4-ah zaa za an tum a ti hlawhtling a ni.

<><><>

FOOD SUPPLY

Aizawl leh Silchar inkar kawngpui National Highway kawngchhiaa a tangkhang lirthei zingah, tuialhthei phur oil tanker leh eirawngbawlina gas phur lirthei te chhuah hmasak an ni a, tuialhthei leh eirawngbawlina gas te hi Aizawl-ah phurh thlen mek a ni.

Khamrang leh Buichali inkar kawng thawm that hna hi zawi zawia kalpui mek a ni a, kan corr thudawn danin hnathawh a chak hleithei lova, amaherawhchu lirthei tangkhang zingah nitin mamawh phur te chhuah hmasak tir dan ngaihtuah a ni.

Nimina ZPM Party inkhawmah ZPM Legislature Party Secretary Pu TBC Lalvenchhunga helai kawngpui thawmthat dan chungchang hi sawiin NHIDCL mawhphurhna ni mah se lirthei te an lo din thup takah chuan a ram neitu an nih angin hma an la mek a ti a, ZPM Legislature Party Meeting kar kalta Inrinni zana thukhawm chuan kawng enkawltute hi hnamdang an nih avangin boulder lakna tur te an haihchham a; quarry kawng a lo chhe bawknen, a hmun ngeia vilpui tha an ti tih sawiin, a tul chen chen MLA leh Minister ten ni tin an vil tawh dawn a ti a. Tun dinhmunah harsatna lian zual sut kian tawh a ni a, lirthei tangkhang pawh zanin lamah chuan a awm tawh lo tura ngaih a ni, a ti.

<><><>

‘MNF PR

MNF Senior Vice President, Dr.R.Lalthanglianan kumin hi sorkarin sum a puk tam ber kum a ni a, GSDP percent atanga chhut pawhin Mizoram leiba san ber kum a ni, a ti.

Nimina Aizawl-a MNF Party Office Mizo Hnam Run inkhawmah he thu hi sawiin Dr Lalthangliana chuan, ZPM sorkarin kum 2024-2025 chung kha inrenchem kumah puang mahse; Mizoramin leiba cheng vaibelchhe 3130 vel a neih belh tih Comptroller and Auditor General of India (CAG) report-ah tarlan a ni a ti a, Mizoram sorkar chuan Covid an tawrh nasat ber kum pawh khan cheng vbc.1800 chauh a puk a ni a ti.

Dr.R.Lalthangliana chuan Union Finance Minister thusawi sawichhawngin, GST hniam reng reng chu Finance Commission atangin sum an dawng tha thei ngai lo a ti a, tuna GST tlahniam ta em em hi restricted tender leh departmental-a contract hna inpek a nasat vang pawh a ni thei a ti.

Kum 2017-18, GST dan hmanga chhiah lak anih tanga a vawi khat nan kum 2024-25 ah Mizoram GST lakkhawm a tlahniam duai a, Covid hunlai pawha la thleng ngai lo a ni a ti a. Kum tharah pawh ziaawm lam aiin a hniam zawngin a kal chhunzawm zel a. Tual chhungah pawisa a vang a, sumdawngten inhralh harsa an ti deuh vek a. A chhan ni ta ber chu budget figure atanga enin ZPM sorkar hi Finance enkawlah a hlawhchham vang a ni a ti.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

OPERATION SINDOOR

Vawiin Lok Sabha inkhawmah Operation Sindoor chungchang sawiho chhonzawm a ni dawn a. Nimina sawihona hawngtu Defence Minister Rajnath Singh-a chuan Rajnath Singha chuan firfiaka chetna leh inbiakna a kalkawp thei lo tih Pakistan hnenah chiang takin a hriattir a ni a ti a. India chhanna kha boruak ti sosang tur chi a nih loh thu leh Pakistana firfiakte inkulhna lai bik chauh an bitum tih a sawi.

Pu Singh-a chuan Operation Sindoor chu sipaite hmalakna chauh nilovin India thuneihna, a nihna leh firfiakte laka a policy sawrkarin a tihhlawhtlin zia tilangtu a ni a ti a. Jammu & Kashmir-a firfiakten Pahalgam an beih hnuah India chuan tum fel tak neiin Operation Sindoor a kalpui tih sawiin sipaiten firfiakte inkulhna hmun kua an kapchhia a ti a. Firfiak 100 chuang an thih bakah anmahni chhertute leh lo puitute pawh thah an ni a, a tam zawk chu Jaish-e-Mohamme, Lashkar-e-Taiba leh Hizbul Mujahideen firfiak pawl ami an nih thu a sawi.

Rajya Sabha-ah pawh vawiin hian darkar 16 chhung Operation Sindoor chungchang sawihona hun hman a ni ang.

<><><>

THAI-CAMBODIA

Ni nga chhung ramri buai avanga an inkah hnuah Thailand leh Cambodia te chuan inkahhai puan an remti. Ram pahnih inkar buaina avang hian mi engemawzat an thih bakah mi sang chuang chenna hmun sawn ngaiin an awm phah a. Mipuiten nunphung pangngai an zawm leh theih nan inremna hi neih an rel a. Nimin Khan Malaysia Prime Minister Anwar Ibrahim chuan chanchinbumite hmaah inkahhai puan anih thu a sawi a. He hunah hian Cambodia Prime Minister Hun Manet leh Thai Acting Prime Minister Phumtham Wechayachai te pawh an tel a ni.

<><><>

NEP

Union Ministry of Education chuan National Education Policy NEP kum nga tlin pualin Akhil Bharatiya Shiksha Samagam 2025 a huaihawt dawn. July ni 29,2020 khan National Education Policy hi bul tan a ni a. NEP avang hian ramchhung zirna kalphung chuan

**bung thar a kai a. Insiamthatna leh ngaihtuahna thar nen
ramchhunga zirna dinhmun siamthat chhoh mek a ni.**

<><><>